


# KONDIMA

 Kasi esengeli ósalela kondima na yo na Nzambe, mpo na kotia yango na mosala. Bomoni? Na bongo ozali na lisékwa na yo moko kati na yo. Lisékwa na yo ezali kati na yo, kati na molimo na yo.

<sup>2</sup> Sikawa boyebi, ntango Yesu akufaki na ekulusu, “Molimo na Ye ekitaki na lifelo koteya milimo oyo ezalaki na boloko, baoyo babongolaki mitema te na ntango ya motema molai na mikolo ya Nowa.” Nzoto na Ye ekitaki na lilíta. Kasi, liboso Ákufa Azongisaki Molimo na Ye na maboko na Nzambe. Kati na maboko. . . “Na maboko na Yo Nazongisi Molimo na Ngai.” Bongo, bomoni, Molimo na Ye ekendaki epai na Nzambe; pe elimo na Ye ekendaki na lifelo; nzoto na Ye ekendaki na lilíta.

<sup>3</sup> Boye, Molimo oyo ezalaki kati na Ye ezalaki Molimo ya Nzambe. “Molimo yango, mbala mingi pe na motindo ndenge na ndenge, ezalaki kopakola basakoli, mpo na komemela bato Nsango, na mikolo ya suka, na nzela na Klisto; pe sikawa, awa na mikolo oyo, na nzela ya Nsango-malamu.” Bongo, ntango toyambi Klisto na mitema na biso, yango nde nyonso oyo tosendeli na yango. Bomoi ya Seko ezali wana.

<sup>4</sup> kasi Klisto akokaki kozonga te kino mikolo misato ékokisama. Mpamba te, Molimo na Ye ezalaki sima ya etando moko, lokola lopango, lokola *boye*, na motindo éte Akokaki kokatisa ngambo mosusu ya lopango yango te, mpo ezalaki Liloba lilobami ya Nzambe, éte “esengelaki na Ye kosala mikolo misato pe butu misato na kati ya lilíta.” Boye, Akokaki kozonga te kino mikolo misato pe butu misato wana ekokaki. Bongo ntango mikolo misato pe butu misato ekokaki, Molimo na Ye ekangolamaki. Ekendaki mbala moko epai na elimo na Ye, pe elimo na Ye ezongaki pe ezwaki lisusu nzoto na Ye, pe ekokisaki oyo Ye alobaki. “Nazali na nguya ya kopesa bomoi na Ngai. Nazali na nguya ya kokamata yango lisusu. Nazali na nguya.”

<sup>5</sup> Sikawa, moko na moko na bino azali na nguya, motindo moko, mpo bozali bana mibali pe bana basi na Nzambe. Pe bobele Molimo oyo ezali kati na yo na ntongo oyo, Molimo Mosanto oyo ezali kati na yo na ntongo oyo, bobele Molimo Mosanto yango ekosekwisa yo. Boye, ozali na kati na yo na nguya ya komisekwisa.

<sup>6</sup> Ntango okufi, elimo na yo ekokende na—na. . . nse na etumbelo ya Nzambe, ezali te. . . mbala moko Liboso na Nzambe. Boye, molimo na yo ekokende epai na Nzambe, kasi okoki kozonga te. Bokanisa lisusu, na kati ya Biblia, Elobami éte molimo. . . “Milimo na nse na etumbelo, ezali koganga: ‘Nkolo, ntango nini, kino ntango nini?’” Pe bakoki kozonga te

kino Makomi ékokisama, pe lokola Klisto, akokaki kozonga te kino Makomi ékokisama. Bongo, sima na, nyonso wana kosila kosalema, minyoko nyonso esili, pe bandeko baleki na minyoko ya ndenge moko, to biso tosili konyokama ndenge bango banyokwamaki, pe bongo na bongo; na bongo na mokolo wana, okoyeba malamumu mpenza esika okundamaki, Nzambe akokangola molimo na yo pe ekoya epai ya elimo.

7 Sikawa, elimo ezali eteni na yo oyo eyebaka makambo, pe esosolaka, mayele na yo. Bozali koyeba lisusu emononeli oyo nazwaki kala mingi te, to mwa komemama, oyo nakendeki na esika wana pe namonaki bato oyo wana? [Losambo balobi: “Amen.”—N.D.E.] Boye, molimo na yo ekozongela nzoto wana, pe lo—lolenge wana ya nzoto, elimo, oyo ezali nzoto oyo esengeli kolia te pe bongo na bongo. “Soki hema oyo ya mosuni ebebisami, tozali na mosusu oyo ezali kozela,” nzoto moko ya lola. Pe elongo na molimo wana, ná elimo wana pe nzoto ya lola wana, okosekwisa lisusu nzoto oyo ya mosuni mpo na Millennium wana ya nkembo. Omoni? Ozali na nguya kati na yo sikaoyo, mpo na kosala yango, sikawa. Na yango, nguya wana oyo ozali na yango sikawa, ekoki kozalisa mokili ya sika. Nzambe azali na biteni ya nzoto, ya mike pe ya motau te; pe biteni ya minene, ya kilo oyo etondi na nguya te. Mwa kosimbama moke ya Nzambe ezali na nguya-nyonso, bomoni, mwa kosimbama moke ya Nzambe. Na boye, boyebi.

Na boye nazómeka komema bino sikawa kati na kondima.

8 Lokola Moklisto, oyebi ete eloko moko ekomeli yo. Boyebi yango? [Losambo balobi: “Amen.”—N.D.E.] Omesánáká kobika *awa* kati na bosoto, na bosoto nyonso ná masumu ná komeláká masanga, ná kobetáká masano ya mbongo, pe—pe makambo ya mokili. Bongo, bobele ntango ondimaki ete Klisto alimbisi masumu na yo, omataki likolo na makambo nyonso wana. Sikawa ozali kobika likoló *awa*, omoni, likolo na yango nyonso. Mpo na nini? Mpo ondimi ete ozali Moklisto. Bongo ntango oyambaki Klisto, pe Molimo Mosantu eyaki epai na yo, na ntango wana ozwi kondima kati na Molimo Mosantu, oyo epesi yo nguya ya kobika likoló na lolenge ya bomoi wana ya lisumu.

9 Malamumu, sikawa, eloko moko oyo osengeli kosala, mpo na komata likoló kati na lobiko ya nzoto, zalá bobele na kondima mingi, kobá bobele—bobele kopusa yango liboso. Omoni? Pe yango wana nde. Sikawa, soki ozali na bokono, pe ozali Moklisto te, komá Moklisto sasaipi, na ntina éte nguya wana ya lobiko na nzoto éya kati na yo, na kokómáká Moklisto. Pe yango ekopesa yo kondima ya kobika likolo ya masumu. Ekopesa yo kondima. Pe nyonso oyo ozali na yango bosenga, kati na mobembo oyo, ezali mpenza kati na yo sikawa. Pe eloko moko oyo osengeli kosala ezali nde kozala na kondima na Nzambe, oyo ékobimisa makambo kitoko, oyo ezali kati na yo, na nzela na Molimo

Mosantu. Sikawa bososoli yango malamu? Bokamati yango? [Losambo balobi: "Amen."—N.D.E.]

<sup>10</sup> Nabanzi ete Billy ayebisaki ngai, na butu eleki, abengaki ngai pe alobaki: "Yaká, na ntongo oyo, ezali mpenza mpo na moto moko oyo ayaki, akanisaki ete tozali na mayangani na mposo oyo, na ntina na Bilembo Nsambo wana." Pe nabanzi ete, bayaki na mwana moko oyo azóbela. Pe soki ozali awa sikawa, misie, kobosana te, okoki te. . . kondima na yo—na yo esengeli kokota na mosala mpo na mwana yango, soki azali—soki azali mwa, mwana moko ya moke.

<sup>11</sup> Kasi tiká ete názwa sikawa Likomi mosusu, soki ezali likambo te, bobele mpo na mwa ntango. [Ndeko Neville ayanoli: "Kendé na yo liboso, ndeko. Amen."—N.D.E.]

<sup>12</sup> Bomikanisela, sikawa, na kati ya Nsango-malamu, totangi na mokapo ya 16, nabanzi, na Misala, esika oyo Polo na Sila bazalaki na butu moko na boloko. Pe babetamaki mpo babenganaki molimo mabe na elenge mwasi ya soloka. Pe ezalaki. . . Pe, ye, bankolo na ye bazalaki na nkanda mpo na yango. Babetaki bango, pe batiyaki bango, na boloko oyo ya kati. Pe ntango basalaki yango, wana Polo na Sila bazalaki kobondela, Nzambe atindaki koningana ya mabele pe ekweisaki boloka na nse.

<sup>13</sup> Mobateli-boloko ya Mofilipia, lokola mokonzi na basoda-nkama, boye, kobungisa bato na ye—na ye ya boloko, asengelaki kofuta yango na bomoi na ye moko na esika ete ézala bato ya boloko. Abendaki mopanga na ye pe alingaki komiboma, Polo akimaki mbango pe alobaki: "Komísala mabe te. Bisó nyonso tozali awa."

<sup>14</sup> Pe mokonzi ya basoda-nkama oyo, toloba, azalaki na makanisi ya lolenge moko boye lokola oyo bango bazalaki na yango na ntina na Polo ná bango. Ekokaki kozala éte bayembaki ba-nzembo. Ekokaki kozala ete batatolaki, to basalaki eloko moko. Kasi, ata ezalaki likambo nini, bayebaki ete bango bazalaki basantu. Bayebaki éte ezalaki na eloko moko ya ndenge mosusu ná bato wana. Mpo éte, noki noki, atunaki: "Esengeli násala nini mpo nábika? Esengeli násala nini mpo nábika?"

<sup>15</sup> Bongo, Polo alobaki: "Ndimelá Nkolo Yesu Klisto, pe yo ná libóta na yo bokobika."

<sup>16</sup> Malamu, sikawa, soki kondimela Nkolo Yesu Klisto. . . Elingi koloba te éte lobiko na ye ekobikisa libota na ye. Kasi soki azali na kondima oyo ekoki epai na Nzambe mpo na lobiko na ye moko, akoki pe kozala na kondima moko mpo na libóta na ye. Pe libóta na ye esengeli pe kokota, bomoni, ndenge moko.

<sup>17</sup> Kaka ndenge Yobo asalaki, lokola nalobaki na mpokwa moko boye, kuna na Georgie, na liyangani moko. Nalobaki: "Yobo, alobaki: 'Sikawa, nayebi te soki bana na ngai basumukaki, bongo soki basumukaki?'" Pe Yobo azalaki na

eloko moko ya kosala, mpo na kozala moyengebeni, yango ezalaki, kopesa mbeka na kotumba. Alobaki ete akopesa mbeka na kotumba, soki bana na ye basumukaki, bongo bakolimbisama na lisumu na bango. Pe yango ezalaki eloko malamumu ndenge tata na bango asalaki yango. Wana nde tata moko ya makanisi malamumu. Tosengeli na batata mingi ya motindo wana lelo. Pe Yobo apesaki mbeka na kotumba. Wana ezalaki liboso éte bolozi na ye éya.

<sup>18</sup> Kasi ntango bana na ye nyonso babomamaki, pe ba-mpate na ye nyonso ekufaki, pe nyonso azalaki na yango, ekamatamaki, afandaki likolo na libondo ya putulu ya moto sima ya ndako na ye, komikwanzáká na eteni ya mbeki.

<sup>19</sup> Botáláki malamumu, sima na mikolo na ye ya bolozi, ntango Nzambe abandaki kozongisela ye lisusu? Esika azalaki na bibwele nkoto zomi, pe bongo na bongo, Azongiselaki ye mbala mibale. Pe Apesaki ye ba-mpate mbala mibale, pe biloko nyonso mbala mibale. Kasi bosilá kotála yango malamumu? Pe Nzambe apesaki lisusu pe Yobo bana na ye nsambo. Bosilá kokanisa esika nini bango bazalaki? Mbeka na kotumba wana ekamataki esika na bango. Babikisamaki, bazalaki na Nkembo, kozela ye mpo áya. Azali elongo na bango lelo. “Yo ná libóta na yo bokobika.” Bomoni? Bongo, Yobo azalaki na eloko moko ya kosala, mpo azala moyengebeni, ezalaki kopesa mbeka ya kotumba.

<sup>20</sup> Yo ozali na eloko moko ya kosala, mpo ozala moyengebeni, ezali, kozala na kondima na Nzambe. Mpamba te, na kondima nde obikisami, na kondima nde obiki na nzoto, na kondima nde ozui nyonso oyo ozali na yango. Omoni? Ezali na kondima, nde ondimi yango. Sikawa: “Ndimelá Nkolo Yesu Klisto, pe yo ná libóta na yo bokobika.”

<sup>21</sup> Sikawa, misié, soki ozali na mwana yango awa mpo babondela mpo na ye, ndimá, yo moko. Nazali awa mpo na koti ya kondima na ngai esika moko na oyo ya yo, pe elongo, tokondima, éte Nzambe akobikisa mwana yango.

<sup>22</sup> Bomoni, tozali na nguya kati na biso mpo na kosala yango. Ozali na nguya kati na yo mpo na kosala yango. Moklisto moko moko azali na nguya mpo na kosala yango. Kasi sikawa soki tokoki bobele kozwa . . . Nguya yango eyangelami na mobeko moko.

<sup>23</sup> Ndenge nalobaka ntango nyonso, ezali lokola nguya ya gravitation oyo eyangelaka máí, mpo ete ezali mobeko. Nguya ya gravitation oyo eyangelaka máí.

<sup>24</sup> Móí, eyangelamaka na—na..to mabele, kobaluka ya mabele. Okoki te kosalisa móí eloko moko, bongo óloba: “Nakanisi nalingi kolala mwa ntango molai. Telemá ngonga moko.” Ekosala yango te, omoni, mpo mobeko moko ezali. Soki osali kokokana na mobeko wana, malamumu, boye, nyonso

ekotambola malamumu. Soki olali na ngonga, okokoka kolamuka na ngonga. Pe soki yo . . .

<sup>25</sup> Lokola tozali na Laki Supérieur, Laki Ontario, Laki Huron, Ba-laki nyonso ya Minene yango boye. Tozali na ba-nkoto zomi mbala nkoto ya bitando ya mabelé awa na Nevada, na Californie, na Arizona pe na Nouveau Mexique, oyo ezali kozika kuna, mpo na kozanga mayi, bitando ya mabelé oyo ekoki kokólisa atá nini. Bokoki koleisa mokili mobimba kuna, soki bobele bozalaki na mái wana oyo ezali likoló awa, kuna na nse. Elingaki kobulunganisa yango te, mpo yango ezali koúta na liziba. Kaka na ntango yango ekiti, na mbala moko etondi lisusu, mpo gravitation nde ékobatela yango wana. Malamumu, sikawa, soki okoki kosala kokokana na mobeko ya gravitation, okoki kozwa mái nyonso ya ba-Laki Minene oyo pe komwangisa ba-mboka nyonso kuna, pe koleisa mokili mobimba, moto moko te akozala na nzala. Kasi okoki te kofanda wana pe koloba: “Iyo. Namoni yango. Ezali bongo.” Esengeli na yo kokende kosala yango.

<sup>26</sup> Malamumu, yango ezali ndenge moko ná mobeko na Nzambe. Mobeko na Nzambe ezali kondima. Pe tozali na kondima awa, na ntongo oyo, mpo na kobikisa atá bokono nini, kosala atá nini. Kasi eyangelami na mobeko moko, pe mobeko yango ezali kondima. Mobeko na Nzambe ezali kondima. Yesu alobaki: “Eloko nyonso oyo osengeli na yango, ntango óbondeli, soki okoki kondima ozwi yango, okoki kozwa yango.” Nde yango wana. Boye, kondima nde ezali koyangela yango, pe kondima epesameli biso bobele ndenge tosengeli na yango. Bongo, tosengeli ko . . . Nzambe apesi na ba-moko kati na biso ndambo ya kondima, na ba-mosusu ndambo mosusu ya kondima. Ezali te éte bozali na nguya moko ya monene koleka mingi. Mpo éte, ntango okomi Moklisto, yo—yo osili kozwa nguya, kasi ozángi nde kondima mpo na kosalela nguya yango.

<sup>27</sup> Bongo, na ntongo oyo, ntango oyei mpo bábondela mpo na yo, mikanisela, Biblia elobi boye. Oyo ezali solo. Yakobo 5:14: “Soki bato na bokono bazali na kati na bino, tiká éte bábenga ba-mpaka ya lingomba. Tiká éte bápakola bango mafuta, pe bábondela mpo na bango. Libondeli ya kondima ekobikisa mobeli, pe Nzambe akotelemisa ye.” Ezali elaká, soki okondima yango. Na yango, omoni, lobiko na nzoto epesameli na moto na moto.

<sup>28</sup> Yango ezalaki na mikolo na Yesu ya Nazarete. Ye akokaki te kobikisa bato kokesana na—kokesana na kondima na bango moko. Alobaki: “Nakoki, soki ondimi. Soki ondimi éte Nazali na makoki ya kosala oyo, Nakoki kosala yango.” Soki okoki kondima yango!

<sup>29</sup> Bongo, bato mosusu babwakelaka—babwakelaka nguya ya lobiko na nzoto epai ya ba-misusu, ba-evangeliste. Ezali bongo te. Nguya ya lobiko na nzoto ezali kati na yo. Yango ezali nde

kati na yo. Bazali bobele kosala yango na ndenge elongobani te. Evangeliste azali na nguya ya kobikisa te.

<sup>30</sup> Molimo Mosantu nde azali na nguya ya kobikisa, pe yo ozali na Molimo Mosantu. Yango nde nzete moke oyo yo ozali, pe biloko nyonso osengeli na yango ezali kati na yo. Na bongo, yo bandá bobele komelaka na elaká na Nzambe, kolobáká: “Ezali solo. Nzambe alobaki éte Akobikisa ngai. ‘Na mapipi na Ye nabikisami.’” Yango wana nde. Oyebi eloko ozali kosala? Obandi kobimisa lobiko na nzoto, esili. Omoni? Na bongo, bamosusu bakoki komona eloko oyo ozali na yango.

<sup>31</sup> Sikawa yango ezali nini, “Kondima ezali endimiseli ya makambo bozali kolikya; etaliseli ya makambo oyo ezali komonana te.”

<sup>32</sup> Nakoki kolona mwa nzete wana kuna. Nazali komona ba-pomme te, kasi yango ezali kuna na kati. Mwa nzete wana eyebi ete yango ezali kuna na kati. Bongo ekobanda bobele komela mái, kokóla pe kokóla, mpo eyebaki éte: “Yango ezali kati na ngai. Nakobimisa yango awa sima na mwa ntango. Pesá ngai mwa ntango. Batelá ngai bobele mwa moke.” Ezali bobele kokóba komela mái. “Iyo, nayebi éte ba-pomme ezali kati na ngai. Nakobimisa yango, sima na mwa ntango.” Pe na mbala moko, talá yango oyo ebimi. Talá ba-pomme yango oyo ebimi, mpo endimaki éte yango ezali kati na ye.

<sup>33</sup> Pe soki ondimi éte nguya ya Molimo Mosantu ezali kati na yo, mpo na kobikisa yo na nzoto, yango wana nde. Kobá bobele kopusa. Omoni? Ozali na kondima. Okoki komona mbano na mbala moko te. Ókomona yango te.

<sup>34</sup> Sikawa, bomoni, Yakobo alongisaki Abalayama na misala na ye. Polo alongisaki Abalayama na kondima na ye. Kati na bango mibale, tóloba nini? Abalayama azalaki kolobela oyo. . . Nalingi koloba, Polo azalaki kolobela oyo Nzambe amonaki kati na Abalayama. Pe Yakobo azalaki kolobela oyo bato bazalaki komona kati na Abalayama. Bomoni? Sikawa, bomoni?

<sup>35</sup> Na bongo, Nzambe ayebaki éte, liboso mwana áya, éte Abalayama azalaki na kondima. Pe Abalayama atalisaki yango na Nzambe, na kosaláká lokola (ye) éte mwana azali koya ntango oyo ye azalaki ekomba. Azalaki na bana te. Libumu ya mwasi na ye ekaukaki, pe ye azalaki ekomba. Kasi ata bongo, ye ayebaki, “Kuna na kati, na esika moko boye mwana azalaki.” Bomoni, akobaki kaka komela elaka, koyekeme likoló na El-Shaddai monene ya Nzambe, *Mabéle*. Koyekeme wana, komela, na koyebáká éte Nzambe akopesa ye yango; ayebaki éte ezalaki elaká, pe Ye asengekali kosala yango.

<sup>36</sup> Pe biso tozali bana ya Abalayama. Bongo tiká tóyekeme na elaká na Ye pe tókangama wana, na koyeba éte Nzambe akosala yango. Alobi bongo. Sikawa, bondimi yango? [Losambo balobi: “Amen.”—N.D.E.]

37 Na bongo tiká éte babeli básala molongó awa, na ngambo moko to mosusu, baoyo balingi éte bábondela mpo na bango. Pe tokobengisa mpaka awa mpo na kopakola bango mafuta, ngai nakobondela mpo na bango, pe tokondima éte Nzambe akobikisa moko na moko na bango. “Soki okoki kondima.”

38 Teddy, ozali wapi? Yaka awa na ngambo ya loboko ya mobali. Ezali malamamu. Pe nalingi éte óbeta *Ndimba Kaka*.

39 Pe wana bazali koya, biso losambo oyo totikali tóngumba mitó, pe tózala kati na libondeli mpo na bato oyo bazali koya.

40 Tata na biso na Likoló, toyeli Yo na ntongo oyo, na Nkombo na Yesu Klisto, libóta na bato oyo, babola, babeli, bato ya minyoko, oyo bazwami kati na lolenge mabe pe ya nsomo oyo. Nandimeli Yo, Nkolo. Na–nayebi éte Maloba na Yo ezali solo. Ezali mpenza solo! Ekoki kokweya te, mpo Ezali Liloba ya Seko ya Nzambe oyo eumelaka libelá. Ezali na nguya nyonso, ndenge Nzambe azali, mpo Ezali eteni na Ye. “Na ebandeli Liloba azalaki, pe Liloba azalaki na Nzambe, pe Liloba azalaki Nzambe. Pe Liloba akomaki mosuni pe afandaki kati na biso.” Sikawa, tondimi yango, Nkolo, na motema na biso mobimba, na molimo na biso mobimba, na nyonso oyo ezali kati na biso. Tondimi yango.

41 Pe nameki, na ndenge moko ya pete, ya bana, kotalisa yango epai na bato, mpo bákoka kososola pe koyeba éte Nguya ya Nzambe ezali kati na bango. Soki bakoki bobele kozala na kondima na bango pe kolanda malako na Nzambe.

42 Ezali lolenge wana nde babikisamaki. Bayéi, bayámbolaki masumu na bango, pe babátisamaki na Nkombo na Yesu Klisto, kokokana na Biblia oyo, Misala 2. Pe Petelo alobaki, éte: “Bokozwa likabo ya Molimo Mosantu.” Pe Yango oyo eyei, kaka ndenge moko mpenza, mpo Yango ezali Liloba na Nzambe oyo emonisami.

43 Bongo, sikawa, na ndenge moko, Tata, toyebi éte ezali solo, na ntango topakoli babeli mafuta, pe tobondeli mpo na bango. “Libondeli ya kondima ekobikisa babeli. Nzambe akotelemisa bango.” Nzambe, tiká éte moko na moko oyo azali awa na ntongo oyo, átika etumbelo oyo, na esengo monene pe na kosepela, na koyeba éte Nzambe asili kobikisa bango. “Kendé, pe biká.” Mpo topesi Yo bango sikawa, na Nkombo na Yesu Klisto.

44 Tiká moto moko na moko ábika, pe ásosola emononeli, oyo yango elingi koloba. “Lokola Abalayama abengaki makambo oyo ezalaki te lokola ezalaki.” Atá mbano ezali ndenge nini, kondima etalelaka yango ata moke te. Mbano ezali eloko moko te. Kondima esili kotelema ngwi. “Pe kondima ezali endimiseli ya makambo oyo tozali kolikya, pe etaliseli ya makambo oyo ezali komonana te.” Nzambe, tiká éte yango ékita na bozindo ya mitema na bango, mpo basengeli na Yo.

45 Nakei lokola mosali na Yo ya komikitisa, kotelema awa elongo na basali mosusu, mpo na kobondela Nzambe átia yango na mitema na biso mpo na bato na bokono oyo. Tosengi yango na Nkombo na Yesu. Amen.

46 Moto moko alobaki éte Ndeko Estle Beeler azalaki awa kati ya losambo. Pe nabanzi éte motei mosusu azali awa, oyo akambaki libondeli, na ntongo oyo. Tokosenga na batei nyonso oyo bazali awa, ata bazali ba-nani, soki bokoki koya awa pe kotelema na etumbelo oyo elongo na biso, mpo na mwa ngonga moke, soki bolingi, bandeko. Pe bato yango. . . Ndeko Ben, natondi na yo. Bóya awa pe bótelema pembeni awa, nzinganzinga na etumbelo awa, bongo tokoki kobondela elongo ná bato oyo, tótiela bango maboko.

47 Sikawa, wana bazali kobeta nzembo. Pe batei bazali kozwa esika na bango awa, bongo biso, moko na moko, tokoki kotiela babeli maboko.

48 Tótala, kouta na ngambo ya ngomba kuna. Nákomona Moto moko azali koya, akesenaki na bato mosusu te. Azalaki bobele Moto lokola bato nyonso, na nzoto moke, mwa motau. Ndenge tomoni Ye ákotala, ná miso na Ye likoló na—na likambo oyo ezalaki kosalema kuna na nse na lobwaku. Ezalaki bayekoli na Ye. Bazalaki na mwana mobali moko kuna, oyo azalaki na maladi ya ndeke, pe na ntembe te éte bango bazalaki koloba: “Bikisá ye, Nkolo! Bikisá ye!”

49 Kasi, bomoni, bobele koloba: “Bikisá ye, Nkolo, bikisá ye,” ekosala yango te. Bobele wana ekosala yango te. Esengeli kozala na eloko moko sima na: “Bikisá ye, Nkolo, bikisá ye,” wana. Bomoni? Pe soki nakoki komema bino kondima yango, pe kondima yango na motema na bino mobimba, bokobika, soki namemi bino komona mpenza emononeli.

50 Sikawa bótala, bayekoli oyo bazalaki ya kotelema wana, ntango mosusu koningisáká ye, ntango mosusu kotindika ye makasi mpenza: “Ndimá yango, ndeko! Ndimá yango! Aleluya! Ndimá yango! Bikisá ye, Nkolo! Bikisá ye!” Kasi molimo mabe atikalaki bobele wana mpo ayebaki éte kondima oyo esengelaki mpo na kobimisa ye ezalaki te.

51 Kasi talá Moto moko azali kokita na ngambo ya ngomba. Pe bobele na ntango yango nde molimo mabe yango asosolaki éte mwa bokeseni moke ezalaki ná bato mosusu wana. . . Bomoni?

52 Sikawa, oyo nde lolenge ya bato oyo tolingi bázala elongo kuna, lokola Nkolo na biso Yesu. Iyo. Koya bobele mpo na komitalisa te, kasi yáká, lingá Nzambe na biso, yéba éte tosili kozwa etinda ya kokende kosala yango. Oyo nde etinda na biso.

53 Na bongo, ntango Ayaki liboso na tata yango. Nakanisi kobanda wana nde nzembo oyo ekomamaki, ekomamaki uta na Liloba. Alobaki: “Nkolo, yokelá mwana na ngai mawa, mpo atungisami mingi mpenza na molimo mabe.” Alobaki:



“Ebwákaka ye na mòto, pe nzoto na ye ekokomaka makasi, pe bongo na bongo.” Alobaki: “Namemaki ye epai na bayekoli na Yo, kasi bakokaki kobikisa ye te. Kasi na—na—nakanisaki . . .”

<sup>54</sup> Alobaki: “Nakoki, soki okondima. Sikawa, Nazali na Nguya kati na Ngai,” Alobaki, “mpo na kosala yango, soki okoki kondima yango.”

<sup>55</sup> Nzambe akolinga kotika éte bato batungisami na cancer, baoyo bafandi awa na ntongo oyo, baoyo basili kotungisama, bakangami na mbeto kotungisama na cancer, ná leucemie, ná bokono, ná mitungisi, Nzambe akolinga kobikisa bango pe átika yo? Ezali bongo te. Te. Bomoni? Boye, Ye akweyaka te. “Nakoki, soki ondimi.” Alobaki nini?

Mpo nyonso ekosalema, kaka . . .

Sikawa, Ndeko Tyler, yaka awa . . .? . . .

Bongo, ndimá kaka, ndima kaka,

<sup>56</sup> Sikawa, wana nazali kobondela, nalingi éte botiéla bato maboko. Ata basengeli na eloko nini . . .? . . . pe bokoba kolanda molongó.

<sup>57</sup> Ndeko Neville, yo pakolá bango mafuta, pe bandeko . . .? . . .

<sup>58</sup> Nalingi éte moto nyonso, kati na liyangani, ná mitó na bino egumbami sikawa. Moto nyonso ázala kobondela na bozindo ya motema.

Kaka . . .

<sup>59</sup> Nkolo, yoká mawa, pe bikisá bato oyo, nabondeli, na Nkombo na Yesu Klisto. Amen.

Na Nkombo na Yesu ya Nazarete . . .?

<sup>60</sup> [Ndeko Branham pe batei bazali kobondela pe kotiela babeli maboko, wana Ndeko Neville azali kopakola bango mafuta. Maloba ezangi na eteni oyo ya bande.—N.D.E.]

<sup>61</sup> Kotala ebele na bato, na molongó, komona eyano na bango na ndenge bazalaki, komona ndenge bazali koyanola na oyo ezósalema. Bomoni? Likambo moko ezali mpenza kosalema, batelemaki pe bayei liboso. Likambo mosusu ezali ndenge bayanoli na likambo wana oyo bango basalaki. Sima na bango kokoma na esika ya kondima, éte, ntango basili kobondela mpo na bango, bakobikisama, bongo bótala mbano na oyo bango basalaki.

<sup>62</sup> Sikaoyo, nandimisami éte na ntongo oyo, mokengeli na biso azali na nsango moko ya malamumu mpo na biso.

<sup>63</sup> Nalingi kobakisa maloba na likambo moko mwa moke, elenge mwasi Mokatoliko atelemaki wana pembeni na etumbelo. Eleki mwa mikolo awa azalaki na ndako na ngai, ye na mobali na ye. Nayebani na mobali na ye kala mingi te. Pe—pe likambo moko esalemaki, wana tofandaki na masolo ngai na bango.

64 Esika wana nde tozwaki emononeli. Esika wana nde biso. . . Liboso, nazalaki kosala yango awa na losambo, kasi ezalaki kozwa ntongo mobimba, pe nyonso. Ezalaki pe bongo kuna.

65 Nalobaki atá eloko moko te, lokola azalaki elenge mwasi, eloko mosusu ezali éte atikalá kobokolama bobele na losambo Katoliko, pe bongo na bongo. Kasi abandaki koloba na ntina na mama na ye. Pe na ntango wana, namonaki mama na ye na emononeli. Nayebisaki ye mpasi ya mama na ye, pe nayebisaki ye na molai ndenge mama na ye azalaka. Ee, ye nde akokaki kokata likambo yango soki ezalaki solo to te. Namoná mama na ye, ata mokolo moko te, na bomoi na ngai. Ayebi yango.

66 Pe elenge mwasi yango, na ntongo oyo, ayaki na etumbelo awa pe atelemaki mpo na koyambola pe koyamba Klisto lokola Mobikisi na ye. Asalaki yango na etumbelo, na ntongo oyo.

67 Ndeko Neville, kozanga koyeba, apakolaki ye mafuta. Talá—talá ndenge Nzambe asalaka! Apakolaki ye mafuta ya babeli. Kasi talá lolenge ya kosala ya Molimo Mosantu. Sikawa, lokola bapakolaki ye mafuta, azalaki mpenza kobela te, kasi bapakolaki ye mafuta. Bomoni ndenge esali éte nyonso etambola mpo na bolamu? Sikawa atelemei wana lokola Moklisto, sima na ye kokoma Moklisto ndenge tondimaka. Sikawa, alobaki: “Okolinga kobondela mpo na mama na ngai? Azali kobela.” Ezali moto yango moko. Bongo mafuta epakolamaki liboso. Namilobelaki, oyo ezali mpenza na molongó, bomoni, mpo na moto oyo auti kobika. Klisto azwaki ngambo na biso nyonso. Azwaka ngambo ya bato nyonso. Pe bobele ntango elenge mwasi oyo akomi Moklisto, mbala moko ye pe alingi kozwa ngambo ya moto mosusu, kotalisa ete Molimo ya Klisto eyei kati na biso ntango tobikisami mpenza. Na bongo, oyo ezali mpenza kitoko. Na—nasepeli na yango mpenza, molimo kitoko ya Boklisto oyo ya kondima. Sikawa, bomikanisela.

68 Sikawa, mpo na elenge mwasi oyo, azali na esika moko awa, pe mwasi Mokatoliko mosusu oyo ayaki. Maloba oyo nalingi koloba liboso názongisa losambo na mokengeli na biso, bomoni, ezali oyo. [Ndeko Neville alobi: “Amen.”—N.D.E.]

69 Sikawa, lingómbá Katoliko ezaláká ntango moko lokola lingómbá oyo. Soki bozongi sima pe botangi Biblia, oyo biso tondimaka, pe boyebi éte Lingómbá Katoliko ezaláká Lingómbá ya ebandeli. Wana ezali solo. Kasi etangwá na Malakisi na Yango. *Oyo* ezaláká lilakisi ya lingómbá Katoliko. Kasi, bomoni, bazali na ba-buku mosusu nkama motoba na ndambo oyo ba-pápá pe bato mosusu bakomá, oyo ezalaka bulée mpo na bango lokola Biblia oyo.

70 Bongo, omoni, likambo ezali ete: obongwanaki te. Eloko osali, outi nde kobongola motema. Omoni? Sikawa soki ozwi. . . Ee, nakanisi ekoki kozala na bamosusu kati na bino, bango

mibale, na ntongo oyo, bazalaki basi. Ekoki kozala na mibali ba-Katoliko oyo bafandi awa.

<sup>71</sup> Soki bozongi sima kotala lisolo ya lingómbá, soki bokoki kotuna sánzó na bino: “Mosala ya bantoma oyo awa na Biblia ezalaki nde lolenge oyo. . . Wana nde ezalaki ba-Katoliko ya ebandeli?” Akoloba: “Iyo.” Pe ezali solo. Bazalaki nde. Sikawa, bango, bótala lolenge ya losambo nini bazalaki na yango. Bazalaki kokutana na mwa esika moko ya mpamba-mpamba. Bazalaki koloba ata moke te “Maria losako” to “Tata wa biso.” Oyo wana ezali mimesano ya lingómbá. Bazalaki koloba nini? Bazalaki kosanzola Nzambe. Bazalaki koganga. Bazalaki kolela.

<sup>72</sup> Bótala awa na Misala 2, ntango santu Ntoma Petelo, ná Yakobo, ná Yoane, pe bango nyonso bazalaki elongo. Biblia elobi éte bazalaki koloba minoko ya sika. Pe bazalaki koganga, na atá kosala makambo mpenza—mpenza ya kotondisama na Molimo, kino bazalaki kosala makambo lokola balangwaki masanga, na lolenge éte atá bato ya libanda batunaki: “Bato oyo balangwi nde masanga?”

<sup>73</sup> Na sima, Petelo, ntoma, mo-Santu Petelo, ntango atelemaki, alobaki: “Bato pe bandeko, bato oyo balangwi masanga te, kasi batondisami na Molimo,” ndenge—ndenge Biblia elobaki. Sikawa, oyo wana ezalaki lingómbá Katoliko ya ebandeli, kokokana na malakisi na bango.


<sup>74</sup> Sikawa, bomoni, sima na mibu pene na nkama mibale, bato ya lokumu babandaki kokota na lingómbá. Bongo basalaki nini? Basalaki ebongiseli na bango ya liboso na Likita ya Nicée na mobu 606 Sima na Mbotama. Basalaki ya bango. . . Ntango Likita ya Nicée esalemaki kuna na Nicée, na Roma, babandaki kokotisa bato nyonso ya lokumu mingi, pe *babongisaki* lingómbá, pe *basalaki* lingómbá.

<sup>75</sup> Sima na yango, ekabwanaki mbala minei to mitano. Balongwaki na—balongwaki na yango kino na episkopo; kolongwa na episkopo bakomaki na pápa. Pe kolongwa na yango, ba-Greki-Orthodoxe babimaki ná bamosusu ya ndenge na ndenge, kino bakabwanaki mpenza, na esika bozali komona yango lelo. Ekabwani mpenza na biteni ndenge na ndenge.

<sup>76</sup> Kasi eloko tozali komeka kosala, moninga na ngai mo-Katoliko, omoni, biso pe tozali ba-katoliko. Tozali ba-katoliko ya liboso, ya ebandeli. Pe nkombo ya lingómbá oyo bazali kobenga biso lelo, mingi mingi, bazali kotala biso lokola ba-pentecotiste, mpo tondimelaka na lipamboli ya pentecote.

<sup>77</sup> Ezali esika wana nde lingómbá Katoliko ekomaki ebongiseli. Pe na bibongiseli na biso ya Pentecote, lelo, soki—soki mokili oyo ekoki lisusu koumela mibu nkama mitano, ebongiseli oyo ya ba-Pentecotiste ekozala na lolenge ya libanda koleka ndenge lingómbá Katoliko ya Roma ezali lelo. Yango ezali bobele kokende mosika, ndenge moko. Pe ntango bakomi ebongiseli,

bakomisi yango lisanga moko boye. Pe bango bakomi bobele bandimi ya lisanga moko boye, pe milimo oyo ebongwani te.

<sup>78</sup> Mpo na bandeko na ngai balingami ya motuya, mibali pe basi, mpo na bino nyonso. Lokola mosali na Nzambe, natikálá koloba likambo oyo liboso te, na mokili, na lingómbá oyo, natikálá koloba te. Kasi lokola mosakoli na Nkolo, nalobi na bino: “Oyo ezali Pole. Bótambola kati na Yango.”[Losambo basepeli pe balobi: “Amen.”—N.D.E.] 

*KONDIMA* LIN61-0813

(Faith)

Liteya ya Ndeko William Marrion Branham oyo, eteyamaki liboso na Anglais mokolo mwa lomingo na ntongo, mokolo mwa 13, sanza ya mwambe, na mobu 1961, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2018 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)